



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

Odluka

**o davanju saglasnosti na Ugovor o generalnom sponzorstvu s NLB Bankom d.d.
Sarajevo i davanju ovlaštenja gradonačelnici Grada Sarajeva za potpisivanje istog**

(Prijedlog)

Predlagač: Gradonačelnica

Obrađivač: Služba za lokalno poslovanje

Sarajevo, septembar 2023. godine

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 31. stav (1) tačka b) Statuta Grada Sarajeva („Službene novine Kantona Sarajevo“, broj 7/23), a u vezi s članom 140. Poslovnika Gradskog vijeća Grada Sarajeva („Službene novine Kantona Sarajevo“, broj 28/09), Gradsko vijeće Grada Sarajeva, na __. sjednici održanoj dana __. __. 2023. godine, donijelo je:

(Prijedlog)

Odluku

o davanju saglasnosti na Ugovor o generalnom sponzorstvu s NLB Bankom d.d. Sarajevo i davanju ovlaštenja gradonačelnici Grada Sarajeva za potpisivanje istog

Član 1.

(Predmet odluke)

Gradsko vijeće Grada Sarajeva daje saglasnost na tekst Ugovora o generalnom sponzorstvu s NLB Bankom d.d. Sarajevo.

Član 2.

(Ovlaštenje)

Gradsko vijeće Grada Sarajeva daje ovlaštenje gradonačelnici Grada Sarajeva za potpisivanje Ugovora o generalnom sponzorstvu s NLB Bankom d.d. Sarajevo čiji je tekst sastavni dio ove odluke.

Član 3.

(Stupanje na snagu)

Ova odluka stupa na snagu naredni dan od dana objave u „Službenim novinama Kantona Sarajevo“.

PREDSJEDAVAJUĆI GRADSKOG VIJEĆA

Jasmin Ademović

Broj:

Sarajevo, __. __. 2023. godine

OBRAZLOŽENJE

PRAVNI OSNOV

Pravni osnov za donošenje Odluke sadržan je u članu 31. stav (1) tačka b) Statuta Grada Sarajeva („Službene novine Kantona Sarajevo“, broj 7/23) kojim je propisano da Gradsko vijeće donosi odluke, druge propise i opće akte i daje njihovo tumačenje, kao i u članu 140. Poslovnika Gradskog vijeća Grada Sarajeva („Službene novine Kantona Sarajevo“, broj 28/09) kojim je propisano da gradonačelnica zaključuje ugovore i druge akte kojima se preuzimaju prava i obaveze za Grad, s tim da se za ugovore veće vrijednosti mora pribaviti saglasnost Gradskog vijeća, u skladu sa ustavom, zakonom i Statutom.

RAZLOZI DONOŠENJA

Nakon finansijske podrške tradicionalnih partnera Grada Sarajeva u organizaciji javnog dočeka Nove godine, interes za finansijsku podršku u organizaciji javnog dočeka Nove 2024. godine izrazila je i NLB banka d.d. Sarajevo. Nakon obavljenog sastanka predstavnika Gradske uprave Grada Sarajeva i NLB banke, menadžment ove banke donio je odluku da podrži javni doček Nove 2024. godine u Sarajevu iznosom od 100.000,00 KM. Uputili su zvanično pismo namjere u kojem se navodi da Grad Sarajevo smatraju partnerom koji Sarajevo pozicionira kao regionalni turistički centar i izrazili želju biti sponzori takvim nastojanjima i ubuduće.

U skladu s navedenim, pripremljen je Ugovor o generalnom sponzorstvu s NLB Bankom d.d. Sarajevo.

FINANSIJSKA SREDSTVA

Finansijska sredstva za realizaciju ove odluke nisu potrebna u Budžetu Grada Sarajeva.

Grad Sarajevo, Hamdije Kreševljakovića 3, 71 000 Sarajevo, JIB 4200295100005, kojeg zastupa doc. dr. Benjamina Karić – gradonačelnica, dalje u tekstu Grad,

i

NLB Banka d.d., Sarajevo ul. Koševo broj 3, 71 000 Sarajevo, JIB **4200344670009**, koju zastupaju Uprava Banke koju čine Lidija Žigić, predsjednik Uprave Banke, Denis Hasanić član Uprave i Jure Peljhan član Uprave, dalje u tekstu Sponzor,

Zajednički: ugovorne strane

su saglasni da uspostave uspješnu poslovnu saradnju baziranu na međusobnom interesu, te u skladu s tim, u Sarajevu, dana __.__.2023. godine zaključuju

UGOVOR O GENERALNOM SPONZORSTVU

Član 1.

Ovim Ugovorom se definišu međusobna prava i obaveze ugovornih strana u svrhu reklamiranja i javne promocije NLB Banke d.d. Sarajevo kao generalnog sponzora prije i za vrijeme održavanja manifestacije „Javni doček Nove 2024. godine“, koja će se realizovati, u organizaciji Grada, ispred Vječne vatre ili druge centralne lokacije 31.12.2023. godine s početkom u 21 h.

Član 2.

Ugovorne strane su se sporazumjele o sljedećem:

- Javni doček Nove 2024. godine će se održati na području općine Centar ili općine Stari Grad ili eventualno na području druge općine Grada Sarajevo
- Drugi Sponzori ne smiju biti druge finansijske institucije

Ugovorne strane su saglasne da će Sponzor aktivno učestvovati u odabiru Izvođača, te da će se isti odabrati uz saglasnu volju obje ugovorne strane.

Grad se obavezuje Sponzoru dostaviti podatke iz prethodnog stava ovog člana najkasnije do 01.11. 2023. godine.

U slučaju da ugovorne strane ne usaglase odabir izvođača, ugovorne strane su saglasne da se ovaj Ugovor raskida te se ugovorne strane oslobađaju svih preuzetih obaveza ovim Ugovorom.

Član 3.

Ugovorne strane su saglasne da će Sponzor biti član Odbora za organizaciju.

Grad se obavezuje da u periodu od 01.12.2023. do 05.01.2024. realizovati promociju Sponzora kroz:

- Apliciranje logoa Sponzora na plakatima, flyerima, i ostalim printanim promotivnim materijalima koje Grad distribuira ili objavljuje u svrhu promocije Javnog dočeka,
- Apliciranje logoa Sponzora na materijalima koji se objavljuju na digitalnim kanalima Grada (zvaničnim profilima Grada te web stranici) u svrhu promocije Javnog dočeka,
- Apliciranje logotipa Sponzora na video materijalima te spominjanje imena Sponzora u audio materijalima koji se javno emituju u svrhu promocije javnog dočeka,
- Aplikacija logotipa na oficijelnim online komunikacijama događaja (baneri na portalima i stranicama te Google oglašavanje),
- spominjanje imena Sponzora od strane predstavnika Grada u svim javnim istupima, uključujući PR tekstove i intervjue, a koji za temu imaju promociju Javnog dočeka,
- Press konferencija najave sponzorstva/partnerstva manifestacije,
- Omogućavanje brendiranja glavne bine te VIP prostora u dogovoru sa Gradom te u skladu sa propisima,
- Na dan Javnog dočeka istaknuti Sponzora na način koji ugovorne strane procijene da je najprihvatljivije,
- Omogućavanje Sponzoru promociju manifestacije kroz PR aktivnosti.

Član 4.

Ugovorne strane su u obavezi da materijale, na kojima se ističu logo ili spominje ime Ugovornih strana, iz člana 2 ovog Ugovora, prethodno dostave drugoj ugovornoj strani na saglasnost/odobrenje.

Ugovorne strane neće odbiti izdati saglasnost/odobrenje, izuzev ako promocija Grada i Sponzora nije u skladu sa korporativnim standardima koji su u elektronskoj formi Ugovorne strane međusobno razmijenile.

Član 5.

Sponzor se obavezuje:

- da će za usluge promocije navedene u članu 3. ovog Ugovora, Gradu platiti iznos od 100.000,00 KM (sto hiljada konvertibilnih maraka) za organizaciju manifestacije „Javni doček Nove 2024. godine“, na račun Grada: Bosna Bank International d.d Sarajevo, Depozitni Račun Grada Sarajeva: 141-196-00000006-98 , Općina: 077, Budžetska organizacija: 000000000, Vrsta prihoda: 733112 - Donacija pravnih lica. Plaćanje sponzoriranog iznosa će se izvršiti nakon postizanja sporazuma ugovornih strana na uslov iz člana 2. ovog Ugovora, s tim što se cjelokupan iznos treba uplatiti najkasnije do 31.12.2023. godine.
- dostaviti Gradu logo Sponzora u elektronskoj formi, kako bi Grad isti aplicirao/istakao u materijalima u skladu sa članom 3. ovog Ugovora.

Član 6.

Ovaj ugovor se raskida u slučaju neispunjenja preuzetih obaveza ugovornih strana na način da ugovorna strana dostavi obavijest o raskidu Ugovora u pismenom obliku drugoj ugovornoj strani, najmanje 7 dana prije dana prestanka važenja ovog Ugovora.

Na raskid ugovora primjenjuju se odredbe Zakona o obligacionim odnosima.

Član 7.

Grad se obavezuje dokumentovati izvršenje svih obaveza iz ovog Ugovora te ih na kraju isteka sponzorstva prezentirati Sponzoru u vidu cjelovitog izvještaja.

Grad se obavezuje predmet Ugovora izvršiti pravovremeno i kvalitetno, na način definisan ovim Ugovorom. Ukoliko ne ispuni preuzete obaveze u dijelu ili cjelini, Grad se obavezuje izvršiti povrat isplaćenih sredstava Sponzoru, uz obavezu naknade štete shodno odredbama Zakona o obligacionim odnosima.

Član 8.

Grad jamči i izjavljuje Sponzoru da u vezi sa bilo kojom fazom pregovaranja ili zaključenja ugovora ili izvršavanja ugovornih obaveza kao jedna strana nije bilo kojoj drugoj strani, obećala, ponudila ili dala bilo kakvu neosnovanu korist i to: zaposlenom, predstavniku, članu organa upravljanja druge strane ili predstavniku javnog sektora u cilju:

- osvajanja mandata ili dobivanja posla; ili
- zaključivanja ugovora pod povoljnijim uslovima; ili
- izostavljanja dužnog nadzora nad ispunjavanjem obaveza (uključivo NLB Banku d.d., Sarajevo ili druga lica) ; ili
- obavljanja ili neprovođenja bilo kojih drugih radnji kojima se nanosi šteta Sponzoru ili pribavlja neosnovana korist bilo kojem zaposlenom, članu Uprave ili Nadzornog odbora, predstavniku ili organizaciji javnog sektora. U slučaju kršenja ili pokušaja kršenja ove odredbe, Sponzor ima pravo da raskine ugovor bez obzira na bilo koju drugu odredbu ugovora, bez prethodnog obavještenja o raskidu i uz potraživanja naknade štete od Grada. U navedenom slučaju ukoliko ugovor još nije stupio na snagu, smatrat će se da nije ni zaključen.

Za potrebe ovog ugovora radnjom korupcije se smatra svako kršenje propisane radnje ili nepoduzimanje dužne radnje, radi postizanja neposredne ili posredne obećane, ponuđene ili date ili zahtijevane, primljene ili očekivane koristi za sebe ili drugoga, uključujući radnje osoba koje iniciraju kršenje ili osoba koje dobivaju korist od kršenja.

U slučaju da Grad daje ili je spreman dati sadašnjem ili bivšem zaposleniku ili predstavniku Sponzora, poklon u obliku gotovine ili drugom bezgotovinskom obliku, ponude za zapošljavanje ili bilo koje druge robe ili usluge koja se može vrednovati u novcu, kao pokušaj da utiče na bilo koju radnju ili odluku u postupku nadmetanja, prilikom potpisivanja ugovora ili izvršavanja ugovornih obaveza, Sponzor ima pravo da raskine ugovor nevezano za bilo koju drugu odredbu ugovora, bez otkaznog roka i plaćanja naknade Gradu.

U slučaju da je bilo koji od predstavnika, zastupnika ili zaposlenika Sponzora zahtijevao od Grada mito, ili je Grad obaviješten da je bilo tko od njegovih zaposlenika, predstavnika ili zastupnika zatražio ili ponudio bilo kakvu neopravdanu korist ili podmićivanje, Grad će odmah prijaviti takve radnje Sektoru za usklađenost poslovanja, sprečavanja pranja novca i sigurnost Sponzora na adresu (<https://whistler.nlb.si/> ili prijava.nepravilnosti@nlb.ba), a Sponzor osigurava diskreciju i zaštitu identiteta prijavitelja u skladu sa internim aktima Sponzora.

Grad se obavezuje da će sprovesti antikorupcijske mjere i u odnosu na svoje podizvođače ili treća lica, ako takvi odnosi mogu uticati na realizaciju ugovora sa Sponzorom. Grad će u

slučaju bilo kakvog djela korupcije poduzeti sve potrebne radnje kako bi ublažio štetu za Sponzora, odnosno kako bi izbjegao ili ograničio takvu štetu.

Grad se obavezuje da neće tolerisati bilo koju vrstu korupcije u bilo kojem obliku, na bilo koji način u bilo kojoj jurisdikciji, čak i ako su takve prakse uobičajene ili dopuštene ili nisu predmet krivičnog gonjenja.

Član 9.

Grad zastupa i jamči Banci da je Banci otkrio sve okolnosti koje mogu predstavljati sukob interesa i poduzeo sve potrebne mjere. Grad garantuje i potvrđuje da ne postoji stvarni ili potencijalni sukob interesa sa njegove strane koji bi na bilo koji način mogao uticati ili ograničiti objektivnost u donošenju jednokratnih ili periodičnih odluka u vezi sa predmetom ugovora, osim onih sukoba interesa koji su prethodno prijavljeni (ako su prijavljeni). Grad će otkriti svaku činjenicu ili okolnost, koja prouzrokuje ili može prouzrokovati sukob interesa između njegovih interesa i interesa povezanih lica i interesa Sponzora.

U slučaju bilo kakvih stvarnih okolnosti iz prethodnog stava ovog člana, čije postojanje nije poznato ugovornim stranama u trenutku potpisivanja ovog Ugovora, ili ako se takve okolnosti pojave nakon potpisivanja Ugovora, Grad se obavezuje da će odmah prestati sa aktivnostima koje predstavljaju sukob interesa ili će poduzeti sve potrebne radnje kako bi spriječio ili ograničio sukob interesa.

U slučaju iz prethodnog stava, Grad se obavezuje da će odmah, a najkasnije u roku od tri radna dana, pismenim putem obavijestiti Sponzora o nastanku takvih okolnosti.

Grad se obavezuje da će najkasnije u roku od tri radna dana od dana prijema zahtjeva Sponzora, dostaviti kompletnu dokumentaciju potrebnu za ocjenu sukoba interesa.

Član 10.

Ovaj Ugovor se zaključuje na period od 3 godine, a što uključuje organizaciju manifestacija dočeka Nove godine 2025. i 2026. godinu o čemu će biti zaključen poseban Ugovor o sponzorstvu između ugovornih strana za svaku pojedinu godinu, s tim što iznos troškova promocije (sponzorstva) ne može biti manji od iznosa utvrđenog u članu 5. ovog Ugovora. Ovaj Ugovor stupa na snagu danom potpisivanja obje ugovorne strane.

Član 11.

Odredbe Ugovora mogu se mijenjati samo uz obostranu saglasnost ugovornih strana i isključivo u pismenoj formi.

Član 12.

Ugovorne strane su saglasne da sve obavijesti koje dostavljaju jedna drugoj u vezi sa ovim Ugovorom, moraju biti u pismenom obliku i biti dostavljene na adrese primatelja navedene u uvodnim odredbama ovog Ugovora. Obavijest se ujedno može dostaviti i putem e-mail-a na dole naznačene e-mail adrese:

e-mail adresa Grada: grad@sarajevo.ba

e-mail adresa Sponzora: marketing@nlb.ba.

Član 13.

Ugovorne strane su saglasne da će sve eventualne sporove proistekle iz ovog Ugovora rješavati sporazumno u duhu dobrih poslovnih odnosa. U slučaju da se eventualno nastali spor ne riješi na način iz prethodnog stava ovog člana, ugovorne strane su se sporazumjele da će rješavanje istog povjeriti stvarno i mjesno nadležnom Općinskom sudu u Sarajevu.

Član 14.

Ovaj Ugovor je sačinjen u 4 (četiri) istovjetna primjerka od kojih svaka strana zadržava po 2 (dva) primjerka.

Za Grad Sarajevo

Doc. dr. Benjamina Karić

Za NLB Banku d.d., Sarajevo

Lidija Žigić, predsjednik Uprave

Denis Hasanić, član Uprave

Jure Peljhan, član Uprave

Datum: _____

Datum: _____

Broj protokola: _____

Broj protokola: _____